
Гиёҳвандлик – иллат, жиноят. Озодлик орзу бўлди

Глобал муаммолар ҳақида сўз борганда, гиёҳвандлик иллатини қайд этмасдан ўтмайдилар. Бугунга келиб ҳам унинг таъсири камайганича йўқ. Аксинча, одамларни бахтдан, ҳаётдан узоқлаштирмоқда. Ёшларнинг тақдирига чанг солмоқда.

Ҳар бир шахс ўзини аср вабосига чалинишдан асраши, атрофдагилар эса чалғий бошлаганларга эътибор қаратиб, уларни жамиятга қайтариш ҳаракатида бўлишлари керак. Чунки бундай одамнинг фикру хаёли фақат бир нарсага – гиёҳванд моддаларни излаб топиш ва истеъмол қилишга қаратилади. Айни шу ҳолатдан фойдаланиб даромад топишга уринаётган шахслар охири-оқибат қонун билан юз-юзма келиб, жавобгарликка тортилмоқда.

1978 йилда Қува туманида туғилган Муроджон Абдулпайзиев ҳам шу иллат савдоси туфайли суд залида жавоб берди. У ўз таниши, илгари бир неча маротаба судланган Умиджон Олимов билан ўзаро тил бириктириб, гиёҳвандлик воситаларини пуллашни бошладилар. Марғилон шаҳридаги “Ўрам” чойхонасидаги келишувда икки оғайни фуқаро А.Артиков (жиноят ишининг унга нисбатан қисми алоҳида иш юритувга ажратилган)дан 2, 48 грамм “гашиш” гиёҳвандлик моддасини 600000 сўмга сотиб оладилар. Иш битгач уни махсус харидор Д.Турсуновага 750000 сўмга пуллайдилар.

Инсон тақдири билан заррача қизиқмаган бу шахслар қилмишларини шу билан тўхтатишмади. Оғайнилар Қувасой шаҳридаги “Бухоро” кафеси олдида 6000 АҚШ доллари эвазига 59,46 грамм “марихуана” гиёҳвандлик воситасини махсус харидорга сотаётган вақтда ҳуқуқий идора вакиллари томонидан қўлга олинди.

Суд ҳукми билан Муроджон Абдулпайзиев олти йил муддатга, Умиджон Олимов етти йил муддатга озодликдан маҳрум этилди. Ашёвий далил тариқасида олинган гиёҳвандлик воситалари йўқ қилинди.

Умид ЖЎРАЕВ,

Фарғона шаҳар ИИБ ҳузуридаги тергов бўлими

суриштирув бўлинмаси катта суриштирувчиси, капитан.

фото: qarshit.uz

2018-02-14 12:15:39